

Rene Herde(AVP)

Reapertura di e refineria no mester stroba otro desaroyo pa San Nicolas

ORANJESTAD - Diripiente e partido MEP kier presenta su mes como e partido cu kier reapertura di e refineria na San Nicolas. Shete aña pasa nan a presiona pa haya mas placa te cera e refineria.

Cuatro aña pasa MEP a bay contra di e reapertura di e refineria. E pregunta ta pakico MEP kier e reapertura di e refineria awor? Ta pasobra tin e posibilidad grandi pa un desaroyo economico completamente nobo na San Nicolas cu MEP no kier wak sosode bao di gobierno di AVP? Pakico net awor cu e mercado di crudo y refinamento di petroleo ta asina malo rond di mundo, cu MEP ta asina na labor. MEP kier pa e refineria no habri pero dji stroba otro desaroyo na San Nicolas mas largo posibel?

MEP y PDR a bisa cu nan tin mas cu 7 compania cu kier cumpra of habri e refineria, pero cada biaha cu bisa nan pa presenta e companianan, nan ta keda keto. Awor MEP y PARA ta bisa cu nan tin otro compania cla pa cumpra y habri e refineria. Pero unda e compania ta? Bo ta kere cu e doño di e refineria no kier haya mas cu 500 miyon dolar pa e refineria cu ta cera? Pakico MEP y PARA kier forsa pa envolve e Americano English den e asunto aki? Kico ta e "wega" cu MEP kier hunga cu interes di pueblo? Tur e preguntanan aki y mas pueblo kier sa di MEP y PDR.

Desaroyo di San Nicolas
Pa AVP e desaroyo di "pariba di brug" ta loke ta importante. P'esey a haci tur lo posibel pa habri e refineria ya na 2011.



Y a logra! P'esey despues cu e refineria a bolbe cera, a bay negocia cu PDV/Venezuela, Pemex na Mexico, Petro Brazil na Brazil, cu Petro China y Pdvs, cu Colombia y Trinidad, cu companianan grandi na Merca. Tur cu e meta pa habri e refineria. Pero mientrastanto gobierno di AVP tambe a cuminsa traha riba alternativanan pa desaroyo di San Nicolas. Ta den e cuadro aki tambe mester wak e construccion di e Green Corridor entre Playa y San Nicolas. Mester di desaroyo economico pariba di brug. Si no ta e refineria, anto mester haci algo otro. Pero no por para keto sin haci nada. No mas!

Condicionnan

Pa reapertura di e refineria AVP ta haya cu mester filha un serie di condicion pa sigura cu e refineria ta keda habri pa en todo caso mas cu 10 aña y cu Aruba y San Nicolas en particular ta beneficia di dje. Kier men cu no ta cu "ken cu ta" ta bay cuminsa un aventura cu ta fracasa y laga Aruba atrobe den problema. P'esey e compania cu nos scoge pa habri e refineria cun'e mester tin experiencia den opera un refineria y maneha compra y benta di petroleo riba mercado internacional. E mester ta un compania cu mester tin su propio petroleo of ta sigur di un fluho constante di petroleo pa e refineria di

Aruba. E mester tin e placa pa renoba y opera e refineria den forma eficiente y sigur pa e trahadonan. E mester ta un compania cu ta emplea trahadonan di Aruba y no ta cuminsa cu existi pa centenares di trahado bini di afo. Esey ta algun di e condicionnan cu partido AVP ta considera necesario.

E proposicion cu sr. English a haci pa trece "venture capitalists", esta hende cu tin hopi placa y cu kier gana mas placa so, no ta aceptabel sin cu cumpli cu e otro condicionnan pa garantiza continuidad. Pa AVP desaroyo di San Nicolas ta loke ta conta. Cu of sin e refineria. Esey ta e meta di AVP. □